

SANTOS MÁRTIRES DE VALDECUNA

De fiestas y turismo

■ Los Mártires ye una oportunidá única p'amosar la nuesa riqueza como conceyu



Diana López Antuña
Conceyala de Turismu y Festexos

Oficialmente, la seronda yá llegó pero, sinceramente, en Mieres nun s'acaba'l branu hasta que nun celebramos Los Mártires, la gran fiesta del conceyu. Una cita enraigonada no más fondo de la nuestra historia, que forma parte de la memoria colectiva y de la que poco se pue decir que nun se dixire yá. Ye la gran romería, esa fiesta que cada unu vive a la so manera pero que nos xune a toos xubiendo la cuesta, tomando un culín de sidra o esfrutando del sabor d'unes buenes casadielles. Falar de Los Mártires ye falar de Mieres, de tol conceyu, de xente llegando dende un llau y otru y coincidiendo en dalgún puntu del camín hasta Insierto, hasta dalgún de los praos de la zona o hasta la escampada de la ermita. Distintos puntos pa una única celebración que diz mucho de lo que somos como pueblu.

Y d'eso xustamente quiero falar güei. De lo que somos y de lo qu'enseñamos de nós mesmos. Porque ta claro que Los Mártires ye un festexu y como tal hai que vivilu. Pero nun podemos olvidar tamién que ye una oportunidá única p'amosar la nuesa riqueza como conceyu. Bastante ye qu'esta fiesta foi declarada fai yá décades d'interés turísticu nacional y añu tres añu xunta muchos visitantes que, llegaos d'otros llugares d'Asturies y tamién d'otros puntos del país, esfruten con nós d'esta cita tan nuestra y, al empar, tan abierta a tol mundu. Y esto conviértese nun gran escapate turísticu y cultural de Mieres. Daqué que tenemos qu'aprovechar. Porque'l Valle de Cuna y Cenera tien una gran riqueza natural, gastronómica, histórica... Ye, ensin dulda, unu de los nuestros grandes atractivos y como tal tenemos que seguir potenciándolo. Cites como el Mercáu asturianu de Cenera y, de xuru, Los Mártires tienen de servir pa seguir potenciando esta zona del conceyu como



Sobre estas línies, ambiente en el día mayor de la romería de los Mártires. A la derecha, Bustiello, paradigma del paternalismo industrial. | LNE

unu de los nuesos grandes referentes. Los que nos visiten estos díes o en cualquier dómina del añu tienen de saber, por exemplu, que nesti Valle pueden visitar el Muséu Etnográficu de Gallegos y el Muséu Costumbrista de Benjamín Pumarada. Amás, por supuesto, de tastiar una bona comida en cualesquier de los establecimientos de la zona, dar un bon paséu pelos distintos caminos del Valle o charrar con dalgún vecín que s'atope saliendo de casa. Paisaxe y paisanaxe. Tenemos qu'aprovechalo y nello tamos.

Mieres tien mucho qu'ufiertar. La fiesta de Los Mártires ye una bona razón pa falar del Valle de Cuna y Cenera, una de les nuestres xoyes, ensin dulda. Pero tenemos más y ente toos tenemos que da-yos el valor que tienen. Porque, ¿qué podemos dicir del pobláu mineru de Bustiello? Un llugar únicu n'España y paradigma del paternalismu industrial. Yo, siquier, sólo puedo dicir una cosa: tenemos que seguir apostando por esti llugar, dándolu a co-



nocer y convirtiéndolu nuna visita obligada pa los que visiten el centru d'Asturies y les Cuenques mineres. Y, si falamos de minería nun podemos escaecenos del Valle de Turón, escritu con mayúscula na historia minera d'esti país y que cuenta con un patrimoniu industrial y arqueolóxicu digne d'admirar y pol que seguimos apostando como nun podía ser d'otra manera. El pozu Espinos, el pozu Fortuna cola so triste historia que nun tenemos d'olvidar nunca, el pozu Santa Bárbara acabante remocicar, el carcavón de la Rebaldana restauráu pola

Asociación Santa Bárbara... Son tantos llugares de referencia los que nos falen del nuestro pasáu, de la nuestra historia y que tienen que convertise n'exe del nuestro futuru como conceyu y como comarca minera. Un futuru que pasa, toi segura, pola minería como actividá industrial pero tamién por saber aprovechar tol patrimoniu industrial que tenemos.

Por eso, aprovecho estes llinies pa pidir al restu d'Alministraciones que trabayen con nós pa consiguilu. Pa poner en valor el nusu pasáu y facer d'él un referente de presente y de futuru. Fagámos-

lo. Y non sólo nel Valle de Turón o en Bustiello. Non, tamién n'otros muchos llugares del conceyu como la Güeria de San Xuan, Lloreo cola so aula del ferrocarril, les nuestres xoyes del Románicu o'l mesmu cascu urbanu mierense. Aprovechemos tolo que tenemos, que ye mucho y variao. Dexemos de pensar que n'otros sitios tienen más y meyor porque nun ye cierto. Nós tenemos cantidá y, lo que ye más importante, calidá. Solo nos queda avanzar nel camín de creelo y apostar por ello. Por falta de materia prima nun va ser. Y nesti artículu fixi referencia solo a dellos llugares. Pero hai más. ¿Qué me dicís de la plaza de Requexu, una de les imáxenes más conocíes y reconocíes del nuestro conceyu? ¿O de llugares privilexaos como Siana o'l monte la Teyerona? Si visitáramos un país nel centru d'Europa, por casu, que nos ufiertara esta guapura natural, estes buelgues industriales y mineres y una hestoria tan rica como la nuestra diríamos que lo tienen too. Y nun nos equivocamos.

Como conceyala de Turismu, digo que tenemos de too y que ye'l momentu de potencialo. Dende'l conceyu de Mieres llevamos años faciéndolo y vamos seguir nesi camín. Esi ye'l nuestro compromisu y cola ayuda y l'esfuerzu de toos vamos consiguir poner la nuestra riqueza nel llugar que-y corresponde. L'oxetivu ta claru y vamos seguir trabayando día tres día pa consiguilu. Quiciabes un día como'l de güei nel que celebramos Los Mártires, fiesta d'interés turísticu nacional, seya un bon día de mano pa creelo. Vamos xubir la cuesta, a dir de fiesta que ye lo importante, pero de xemes en cuando nun ta de más que miremos al nuestro alreduro y nos decatemos de la guapura que nos arrodiada. Ye lo que somos, ye nuestro y tenemos que dalo a conocer. Un día de fiesta ye un bon momentu pa ello y asina vamos empezar a ver que San Xuan, la Foliya o cada fiesta en cada núcleu del conceyu son tamién los nuestros meyores escaparates. Mostrémonos y festexemos. ¡Feliz fiesta de Los Mártires a toos y a toes!

«Una Romería sinu de la nuesa cultura, de la nuesa identidá
¡Disfrútala!»



izquierdaxunida
GRUPO MUNICIPAL